

Tiwei Jems Kewisik

Menmen me tiwei ik

Jems katip mit gude 1:1

Neimin ap nertei menmen me God, ehir nanitiwekhiyem 1:2-8

Him me mit netenen menmen yapirwe, enetike mit han menmen auri 1:9-11

Him me menmen mamri han kaiu emamitaipin haiu mamininem 1:12-18

Him haiu memtewem haiu emisesim 1:19-27

Haiu han ekitet mit yapirwe hir nipiran 2:1-13

Him me mit ap niriak menmen yaaim, ehir ap nises God werék werék
2:14-26

Haiu mit naanempre menmen haiu metpim 3:1-18

Him me mit ne weiwik me God enetike menmen enum me ti 4:1-5:6

Jems katip mit him mikaru 5:7-20

1 ¹Hi Jems hi hiriak menmen me God ketike Mitik Iuwe Jisas Krai, hi wok mitik kirakit. Hi hesiuwe tiwei ik ken yi mit ne weiwik me Isrel yises God yi yewep yerer wit wit.

Menmen mari han kaiu mekepai haiu emises God werék werék

²Nai yinan, me wi menmen enum me ti mamnen mamri han ki, yi ap han enuk au. ³Yi han yaaik eiyu eiyintar yi yertei menmen yi yisesim mamkepi yi eiyinin menmen enum im me ti te yi han tokik eiyu yi eiyises God werék werék. ⁴Yi han tokik eiyu keriyen au. Yi eiwis menmen im mekre han ki mamkepi te yi eiyu werék eiyir ke mit iuwe yi eiyises menmen yapirwe me God werék werék.

Mit ap nertei menmen werék werék hir enitehi God kakikepi

⁵Neimin ne yi mit yi ap yertei werék werék mekam yaaim, mekam enum, yi eiyitehi God kakikepi kakinterim te hirak kakikepi yi eiyirteiyem werék werék. Yi eiyitehi God kakikepi eiyintar menmen im. God kepwetai haiu mit menmen mirak yapirwe weinin hirak ap kenai

^a 1:1 Ga 1:19; Ap 15:23; 1Pi 1:1 ^b 1:2 Ro 5:3-5 ^c 1:3 1Pi 1:7 ^d 1:5 Pro 2:3-6

kakintar haiu emitiwekhi kakikepai au. Hirak han yaaik. ⁶ Mit nitehi God me menmen, hir han ekitet God kakikepi kakrekoyem. Hir han ekitet God kakikepi au, hir nire wan sir nime metitiwem mekrit mewen heriyai heriyai, hir ap nertei God kakikepi me menmen o au. ⁷ Mit narik hir ap han ekitet hirak God kakikepi kakrekoyor menmen au ⁸ kakintar hir han kitet menmen miutip miutip werek werek wen au.

Him me mit netenen menmen, mit au nau weinin

⁹ Neimin ne nau yinan netenen menmen au, hir han yaaik enu enintar God kakikepi kaktorhis nanino wit kirak. ¹⁰ Neimin ne nau yinan netenen menmen yapirwe, maain hirak God kewis menmen enum mewaankem, hir han yaaik enu enintar menmen mir iuwe au. Hir han yaaik enintar God kakikepi kaktorhis hir keriyen nanino wit kirak. Maain hir naninaaiwir menmen mir hir nani nanir ke timen mamu wi mei kike hiram mami. ¹¹ Timen mewep, mesiupan, wepni kan tipar men hiram meweiwei maa meket. Mar im me wi mit netenen menmen yapirwe niriak menmen nisesim, hir nire timen hir nani. Te haiu ap han ekitet menmen haiu metenenim mamkepai haiu mamu werek. Au, God kerekek.

Yi naanempre hiras me menmen enum mamri han ki

¹² Neimin hir nanu han tokik ke menmen enum mamnen mamiwaanki, hir han yaaik enintar hir naninin menmen enum te God kakrekoyor han kir kire hirekes nantikerek nanu. Nipaa God katip neimin han tewenina, hir nantikewa nanu tipmain tipmain enum eik. ¹³ Me wi ham menmen mamri han ke mitik te hirak kiriak enum, hirak ap kaktip, “God kari han kai hi hiriak enum.” Menmen im au emit! God ap te kakri han ke mit hir nanriak enum au. Menmen ap te mari God han kirak hirak kiriak enum taau. ¹⁴ Menmen enum mit niutip niutip hanhanem, hiram mari han kir hir niriak enum mar ke mit nemtin menmen mau tirpe mari miyak man mekrerem. ¹⁵ Menmen im enum hiram mire nu hapin nikim mikin men ti. Maain hiram mewo ere iuwe hiram menep mit mewaanki. Mit hir hanhan menmen enum hir niriakem hiram mire hapin nikim matin yapirwe. Menmen enum mekre han kir mamno ere iuwe mamnipi nani nanino si.

¹⁶ Nai yinan yaain, yi ap eiwis menmen enum im mamitipin yi han kitet hiram me God au. ¹⁷ Menmen yaaim yapirwe hirak God kerekek kesiuwerem haiu mit metiwem. God hirak kiriak wepni, wenke, hir. Hiram men miriak himin mire yinam, nokim o mamre witaan te God keweikin kar ek au. Hirak kepu kipirak kerekek kiriak yaaim keremem,

^e 1:6 Mk 11:24 ^f 1:9 Je 2:5 ^g 1:10 Ais 40:6-7; 1Pi 1:24 ^h 1:12 2Ti 4:8 ⁱ 1:14 Ro 7:7-10
^j 1:17 Mt 7:11

enum au. ¹⁸^kHirak kises han kirak hirak kerekyei haiu nikerek nirak mentar him yaaim mirak hirak epei kewepaiyapirem haiu memtewem. Haiu mire hinaan nikim ham minin mekiute, maain ham mamkaru. Haiu mit in minin mises God me mit nerer wit wit, maain hir mit han enisesim.

Menmen yaai yi eiyimtwem yi eiyisesim

¹⁹^lNai yinan yaain, yi eiyirtei menmen im. Yi mit niutip niutip nikip emnep waswas yi eiyimtau menmen. Te maain yi eiyitpim te yi ap han enuk eiriuwe mit yi eineri waswas au emit! ²⁰Menmen mar im ap te mamkaap mit nanises menmen yaaim God hanhan haiu emisesim emteikin mit han em au. ²¹^mTe yi einaaiwir menmen enum mau han ki mamrekyi yi eiyises menmen enum. Yi hanhan eiyises him yaaim nipaa God kewisim mekre han ki. Te hiram mamkaap himin ki kaktike God yi eiyu werek werek.

²²ⁿYi ap eimipin hiras! Yi han kitet yi eiyimtau him me God te ap eiyisesim au, hiram mamkepi. Taauye! Yi eiyimtau him mirak yayisesim te hiram mamkepi. ²³Mit kerek nemtau him me God keremem te hir ap nisesim au, hir nire mitik kir himin kirak kekke tipar. ²⁴Hirak ken, waswas hirak han kaa menmen enum mau ninaan mirak. Marim mit kerek nemtau him me God keremem ap nisesim au, te hir nar ke mitik eik. Hir ap newis him me God mamkepi hir ninaaiwir menmen enum te hir nanises menmen yaaim. ²⁵^oMit kerek nekine him yaaim me God mit newisim mau tiwei hir nar ke mitik kir ninaan mirak mekre tipar, hiram mamkepi naninaaiwir menmen enum. Hir han kitetim ap han kaa rem au, hir nisesim te God kakrekyor menmen yaaim.

²⁶^pMit kerek han kitet hir yaain nises God werek werek, te hir natip enum, hir nemipin hiras nises God werek werek au. Hir nisesik weinik. ²⁷God Haai han kitet menmen im maminin mamkaap mit te hir nanisesik werek werek. Hiram menmen im: Mit hir naanempre miyapir o nikerek kerek mit nir hir epei naa ninaiwiri. Menmen im metike hir ninaaiwir menmen enum mit ne ti nisesim, te hiram mamiwaank han kir mar ke heinut mewen menmen te mit nanim au hiram mewaankem.

Haiu hanhan mit miyapir yapirwe mipiran

2 ¹^qNai yinan, yi eipises Mitik luwe kaiu Jisas Krai hirak Yaaik luwe, te yi ap eiriak mit han menmen yaaim enintar hir netenen menmen mei yapirwe, mit han netenen menmen yapirwe au, yi eirekyor enum. Menmen im au emit! Yi eirekyor menmen yaaim mipiram. ²Mitik hak

^k 1:18 Jo 1:13 ^l 1:19 Ekl 7:9 ^m 1:21 Kl 3:8; 1Pi 2:1 ⁿ 1:22 Mt 7:26; Ro 2:13 ^o 1:25 Ro 8:2; Je 2:12; Jo 13:17 ^p 1:26 Sam 34:13, 141:3 ^q 2:1 Ap 10:34; Je 2:9

niuk iuwe hirak keremink sak nikin, o hore haam, hirak kaknen kaktike mitik hak enuk ketenen menmen au, hirakit tatnen winak ke God yi yewik, ³te yi eitip hirak yaaik niuk mirak iuwe hirak eknen eku yeno eku niu, te yi eitip hirak enuk weinik hirak eku ti weinik, ⁴yi yiriak enum. Yi enun yenke yi hiras yises han ki enum. ⁵Nai yinan yaain, yi eiyimtau menmen im. God hirak kehimitan mit ap netenen menmen yapirwe au te hir enisesik entenen menmen yapirwe mirak. Hirak epei katip neimin han teweninek hirak kaktorhis hir nantikerek nanu werek werek. ⁶Te yi yiriak mit netenen menmen au hir yink enuk nentar yi yerekyor enum. Neimin hir neriwaank nari yi mit eino mit iuwe ne gavman nemtau mit hir nesiuwe him nerekyi enum a? Hir mit netenen menmen yapirwe keriyen! ⁷Hir mit in keriyen natip enum me niuk me Kraiss nipaa mit nikri nekine niuk mirak. Te yi yenmak yiriak mit netenen menmen yapirwe yerekyor yaaim a? Au emit!

⁸Yi eiyises him nipaa God kewisim kar ik: “Yi han tewenin mit nar ke yi han tewenin hiras,” te yi yiriak yaaim. ⁹Au, yi yewep mit yi hanhan neiyen, neiyen au, te yi yiriak enum. Him yaaim me God meteikin yi enun yewenin him mirak. ¹⁰“Mit kerek newenin him mei me God miutip, hir nar ke mit newenin him mirak yapirwe. God skelim mit in kakinterim hirak kaknip. ¹¹“Hirak God katip him im, “Yi mit yetike miyapir ap eiyiryanhis eiweninem au emit!” Hirak kerekek katip him ham mar im: “Yi mit ap einep mit han nani au emit!” Yi yetike miyapir ap eiriyanhis eiweninem au, te yi yire yenep mitik kaki, te yi epei yewenin him me God. Te hirak skelim yi mit kakiwep kakinterim. ¹²“Te yi eitip yaaim eiriak menmen yaaim eiyintar maain God han kakitet o skelim yi mit kakriuwe him nipaa hirak kewet haiu mit em te haiu emnaaiwir menmen enum. ¹³“Neimin nises him me God hir ap han tewenin mit han nerekyor yaaim au, te maain God skelim yi mit hirak ap hanhan kakriuwi yi mit au. Neimin hir han tewenin mit nanrekyor yaaim, maain me wi God skelim mit, hir nanu werek.

**Mitik katip hirak kises him me God te ap
kikaap mit han, hirak ap kisesik taau**

¹⁴Nai yinan, mitik katip kar ik: “Hi hises him me God,” te menmen hirak kiriakem keteiknaiyem au, im em mamkepik mamirkeik? Menmen im hirak kisesim hiram ap mamkepik te hirak kaktike God tatu taau! ¹⁵⁻¹⁶“Mit o miyapir hir nises God te hir netenen menmen yapirwe mamkepi hir nanu werek au, mitik kiutip kekere nimin ke yi mit ketenen

^r 2:5 1Ko 1:26-28 ^s 2:8 Mt 19:19; Ga 5:14 ^t 2:9 Diu 1:17 ^u 2:10 Mt 5:19 ^v 2:11 Eks 20:13-14; Ro 13:9 ^w 2:12 Ga 6:2; Je 1:25; 1Pi 2:16 ^x 2:13 Mt 5:7, 18:32-35 ^y 2:14 Mt 7:21 ^z 2:16 1Jo 3:17

menmen yapirwe hirak kakitpor kakir ik, “Yi eiyu werek werek eiyineitin klos, o menmen te yi eiyu werek,” hirak ap kakikepi kakwetir menmen au, menmen hirak kare kisesim ap mamkepi taau! ¹⁷Te menmen me God mit hir nisesim hiram mar im. Mitik kare kises him mirak, hirak ap kiriak menmen kikaap mit miyapir han, menmen me God hirak kisesim hiram weinim.

¹⁸“Mitik hak hirak kaktip, “Mitik hak kises him me God, te hak eik hirak kiriak menmen yaaim te God kaktip hirakit wik yaaikit.” Mitik ap kiriak menmen yaaim au te hirak keteikno hirak kises God akirkeik? Taauye! Hi eteikniwek hi hises God werek werek heriuwe menmen yaaim hi hiriakem. ¹⁹“Yi mit kerek yi yatip yi han kitet God hirak kiutipen kepu, yi han kitet werek. Te hiram menmen weinim. Herwe hiram mertei God kerekek kepu hiram mepirpir. Te yi han ekitet hiram mamkepi hiram mamisesik a? Taauye! ²⁰Yi yetaritari mit! Hi tewen eteikni yi yatip yi yises him me God te yi yiriak menmen yaaim au, hiram mamkepi eiyu eitike God taau! Yi han ekitet menmen im.

²¹“Nipaa maam kiau Ebrahim keit nikan kirak Aisak, hirak keyiyik ken kewisik kentar kinaan me nan te hirak kakikip si tatik hirak kakwepwarek kakwet God ek. Hirak kiriak menmen yaaim im keteikin hirak hanhan kakises him me God. Te God katip hirak yaaik kisesik werek werek. ²²“Yi yertei? Menmen hirak kisesim mekepi te hirak kiriak menmen yaaim. Menmen hirak kiriakem meteikin hirak kises God werek werek. ²³“Him nipaa God ketpim hiram epei man. Hiram matip, “Mitik Ebrahim hirak kemtau him mirak kisesim te God katip hirak yaaik kisesik werek werek. Te God katip hirak Ebrahim hirak kirak yinak kenterim.” ²⁴Tis, yi eiyirtei God hirak katip mitik hirak yaaik kisesik werek werek kentar hirak kisesik kiriak menmen yaaim. Hirak katip hirak yaaik kentar hirak kisesik weinik taau! ²⁵“Nipaa wi ham mite Rehep hire wari mitikit wik Josua hirak keriuwetet ten, hire naanmiprewakit weriuwetet teke yayiwe hak pike ten. Hire wiriak yaaim te God katip hire yaap wisetik werek werek. ²⁶Mitik hirak kises God, hirak kiriak menmen yaaim au, menmen hirak kisesim hiram weinim. Hiram mire mitik hak hirak kaa, himin epei ken kinaaiwir yink kirak kerekek, hirak kipwaaai.

Haiu mit naanempre hiras me menmen haiu metpim

3 ¹“Nai yinan, yi yapirwe ap eire mit hir ninin newepyapir him me God eiyintar yi yertei maain God hirak skelim haiu mit haiu minin mewepyapir him mirak te hirak kakninai iuwe, mit han kerek hir weinin

^a 2:18 Ga 5:6 ^b 2:19 Mt 8:29 ^c 2:21 Jen 22:9-12 ^d 2:22 Hi 11:17-18 ^e 2:23 Jen 15:6; Ro 4:3, 9, 22; 2Kro 20:7; Ais 41:8 ^f 2:25 Jos 2:4, 15, 6:25; Hi 11:31 ^g 3:1 Lu 12:47

en, au kaknini kike. ²Haiu mit yapirwe ap han kitet menmen werék werék au, haiu miriak menmen enum yapirwe. Mitik kerek hirak ap katip enum au, hirak mitik yaaik hirak kertei kewen han kirak naanempre hirekes werék werék. ³Haiu mewis waai mari hos him kiram te hiram mises han kaiu. Haiu mari waai ken pinak eik, hos hiram meweikin hiremes misesim. ⁴Yi han ekitet sip me wan eik. Hiram wisenum nime metitiwem meminp meiyim men te mit neweikin paan miram neriuwe paap mau nimin hiram mamises han kir. Hir niriakem nar ke nu mekiuwe mani mit neweikin paan miram mamno nein mit hanhani. ⁵Te nin kerekek hirak kike kire waai ke hos o paap kike kau sip. Nin kekre him hirak menmen kike te hirak kekrit menmen iuwe kinin yink kaiu.

Si yeunek kike hirak si tatik yaank iuwe. ⁶^hNin hirak enuk kire si yeunek. Hirak kau nimin kekre paan kaiu hirak kises menmen enum me ti kerekyei haiu mit enun. Hirak kire si tatim menmen yapirwe, nin hirak kises menmen enum em Seten hirak kikiam kewaank menmen yapirwe me mit. ⁷⁻⁸ⁱMit epei nehis newenin miyak o hore, manpen metike menmen mekre wan. Te mit hir ap naanempre nin kir kaktip menmen enum taau. Nin hirak ap kau keit au. Hirak kire miyak enuk ke niu keriyaam ken in ken ein. Hirak enuk kire manpen yehes enum, hirak kewaank himin ke haiu mit. ⁹^jHaiu mit meriuwe nin kaiu mewenipi God te meriuwe nin kiutipen kerekek haiu matip him enum me mit kerek nipaa God hirak kerekyei mit yapirwe haiu mire hirekes. ¹⁰Me him kiutip kerekek haiu mit matip him yaaim, him enum. Nai yinan, menmen haiu miriakem mar im au enum emit! ¹¹Hiram tipar minin metike tipar yaaim miniu mehinhin mamike hei kiutipen mamirkeik? Taauye! ¹²Nu hamis ap kakri kaku hinaan taau! Hinaan ap kakri kaku hamis taau. Mar im tipar yaaim miniu mehinhin mamike hei me tipar minin taau! Te haiu mit ap mamtip him yaaim him enum au emit! Him yaaim keremem meke him maiu mamnen.

God kekepai haiu mertei menmen mirak yaaim

¹³Keimin ke yi mit hirak kinin kertei menmen yaaim menmen enum? Mitik kar ik hirak ekteiknai menmen hirak kerteiyem ekriuwe menmen hirak kiriakem. Hirak ap kises menmen hanhan hirekes au. Hirak kises menmen me han tewenin mit, im metike menmen me han kitet God. ¹⁴Yi hemkre menepam yentar menmen me mit han o yi han enuk yeriuwe mit han, yi han kitet yi yaain yi yinin mit han, te yi ap han kitet God kaktip yi yaain yi yertei menmen werék werék au. Yi han kitet menmen mar im te yi yemipin. Him me God katip yi enun. ¹⁵^kMenmen im hiram ap me God au. Hiram me mit ne ti keremem. Seten hirak kinin kiriakem te hir

^h 3:6 Mt 12:36-37, 15:11, 18-19 ⁱ 3:8 Ro 3:13 ^j 3:9 1Ko 11:7 ^k 3:15 Je 1:5, 17

mit ne ti hir nisesik niriakem. ¹⁶Yi hemkre menepam yentar menmen me mit han o yi han enuk yeriuwe mit han, yi han kitet yi yaain yi yinin mit han, te yi hiras yenehan yi eiriak menmen enum yapirwe. ¹⁷Te mit hir nises han kir yaaik God hirak kewetirem, hir ninin niriak menmen yaaim mire mani nemnok enuk. Namin au. Hir ninin niriak im metike menmen im. Hir nankiyan nanu nanit, hir nanimtau him me mit han neweiknor han, hir han tewenin mit nankepi, hir nanriak menmen yaaim keremem. Hir nanriak mit yapirwe menmen yaaim mipiram, hir ap mit ne him pinak him pinak au. ¹⁸Mit kerek hir nankaapan nankiyan nanu nanit keriyen hir te nanir ke mit hir namir nu yehes. Neimin nanriak menmen im hir nenip mit hir hanhan nises menmen yaaim mir. Menmen im hiram mire nu yehes mewo.

Mit nises menmen enum me ti ik hir nire nepan ne God

4 ¹Mekam hiram hir o as me menmen hiram mekeyi han ki menipi yi yatip enum yi yenehan yenehan a? Han ki kekrit kises han kirak te yi yenehan yenehan. ²Yi hanhan menmen yi eitiwem au, te yi hanhan einep mit te yi eitiwem. Yi hemkre menepam eiriuwe menmen eitiwem taau, te yi yetpim yenehan yenehan. Yi ap te eiyit menmen eiyintar yi ap eiyitehi God em. ³Maain yi eiyitehi God menmen, yi ap eitiwem au eiyintar han ki enuk. Yi hanhan yayit menmen te yi eiyises han ki yi eiriak enum eiriuwerem. ⁴Yi mit miyapir enun yi yeweikin sip yewet God. Menmen im hiram mar ke mite winaaiwir mitik kire, hire wetike mitik hak nariyanhis neweninem. Yi hanhan menmen enum me ti ik e, yi yire mit nepan ne God. Yi eiyirtei menmen im o au a? Neimin hir hanhan menmen me ti hir nire mit nepan ne God. ⁵Yi han kitet him me God mit newisim mau tiwei hiram matip weinim marim? Hiram matip, “Himin kiau God kewisik kekre yink kiau hirak hemkre menepam hanhan menmen wisenum.”

⁶Te God hirak iuwe kakikepai maminin menmen im mekre han kiau. Him mirak mau tiwei matip mar ik: “God hirak keweikin sip kewet mit kerek han kitet hir iuwe ninin mit, te hirak kakikaap mit hir ap hanhan hiras, hir natip, ‘Hi mitik weinik God kerekek hirak Iuwe.’” ⁷Te yi mit ap hanhan hiras yi eiyises God. Seten kakri han ki yi eiyu han tokik eiweikin sip eiwet menmen enum te hirak kaknawiri kakno. ⁸Yi hanhan God yi yisesik te hirak kaknen menep naanmampri. Yi mit enun yi yatip him pinak him pinak yi eiweikin sip eiwet menmen enum yi han yaaik eiyu eiyir ke mit nankemyet his prar prar mamit. ⁹Yi mit yi eiyinwesis

¹ 3:18 Mt 5:9; Ais 32:17; Hi 12:11 ^m 4:1 Ro 7:23; 1Pi 2:11 ⁿ 4:4 Ro 8:7; 1Jo 2:15

^o 4:5 Eks 20:3, 5 ^p 4:6 Pro 3:34; Mt 23:12; 1Pi 5:5 ^q 4:7 Ef 6:12; 1Pi 5:8-9 ^r 4:8 Sek 1:3; Mal 3:7; Ais 1:16

au. Yi eikit. Yi ap te han yaaik eiyu au. Yi yink enuk kerekek, han etwenin menmen enum yi yiriakem. ¹⁰Yi mit yink enuk te yi yewepyapir yi enun me ninaan me God hirak kakrekyi yaaum yi eiyu werek werek.

Haiu ap emkan naiu yinan

¹¹Nai yinan, yi ap eitipan enum eiyisesan au emit! Keimin katip enum kesiuwe him kirak yinak, hirak keweikin sip kewet him iuwe me God. Menmen im hirak kiriakem hiram mar ke hirak katip him mirak minin him lo me God te hirak kekrehir ke God. Ti keimin ti hiriak menmen mar im ti ap hises him me God au, ti atip him mit minin mirak. ¹²God kerekek hirak kewis him iuwe mau tiwei. Hirak kerekek kaksiuwe him mamno haiu mit, hirak kakikepai o au en, hirak kakwep mami mamno si. Ti han kitet ti God te ti hesiuwe him mamno kit yinak a? Taauye! Ti mitik weinik kerekek.

Yi han ekitet menmen God hanhan yi eiriakem

¹³Nikip emnep yi eiyimtwewek. Yi mit kerek yi yatip, “Petepin o teipmen haiu mamno in o mamno ein mamu tito miutipen mamisiuwe menmen iuwe mamit pewek mamrerim.” ¹⁴Yi yatip yar ke mit hir nertei mekam maain mamnen te yi yepitari teipmen mekam mamnen taau! Yi yepu yire napi. Hirak kiwapin ti kike, maain kakwen kakno. Yi yayu kike, maain yi yayi yaire napi ik ek. ¹⁵Yi ap eitip emir em au. Yi eitip emir im. Yi eitip, “God hirak hanhan haiu mamu mamit, haiu mamriak im o em.” ¹⁶Te yi mit wen yatip han kitet yi hiras epei yiriak menmen, God kakikepi au. Yi yatip han kitet marim, hiram enum. Yi ap yewis God ketpi menmen yi eiyisesim au. ¹⁷Tis, mit kerek hir nertei mekam yaaum, hir ap nisesim au, hir niriak enum.

Hirak Jems kene mit hir netenen menmen yapirwe

5 ¹Yi mit kerek yetenen menmen yapirwe, nikip emnep eiyimtau. Yi einepip eikit me menmen enum mamnen mamriwaank. ²Menmen mi, yurik henye mi hiram minin heinut mewenem, mesik yipep meremirir miyak patin. ³Tekei, suwau mi ni menterim te hiram mamwep. Ni mentar pewek winak meteikni yi ap yikaap mit yewetirem au. Yi yisawinem mekre winak. Menmen im maain hira mamiwaank himin ki mamre si tatik yink ki. Yi epei yetenen winak pewek menmen yapirwe yaaum yisawinem meit me wi menep Jisas hirak pike kaknen. Menmen im hiram ap yaaum au. ⁴Yi eiyimtau! Mit hir niriak ni namir menmen mewim,

^s 4:10 Jop 5:11; 1Pi 5:6 ^t 4:12 Ro 2:1, 14:4 ^u 4:13 Lu 12:18-20 ^v 4:14 Pro 27:1; Sam 39:5, 11 ^w 4:15 Ap 18:21 ^x 4:17 Lu 12:47 ^y 5:1 Lu 6:24 ^z 5:2 Mt 6:19 ^a 5:4 Du 24:14-15; Mal 3:5

te yi yetenen pewek mir yi yisawinem yemipin yewetirem au. Menmen enum im metike him me mit hir neket menmen mi mau ni, hir natip me menmen enum yi yiriakem, hiram epei men nikip me God hirak iuwe hirak kemtewem. ^{5b}Yi epei yau werek werek in ek yaam menmen yapirwe, yi yises han ki ke menmen yapirwe. Menmen im enum yi yisesim, hiram mar ke mit newet sak menmen maam maam ere iuwe, maain hir nanmip. Mar im wi epei man menep te God kaksuwe menmen enum mamiwep yi yayi yayir ke mit hir nenep sak hiram mami. God kakriak menmen im kakintar menmen enum yi yisesim. ⁶Yi epei yewepyapir mit yaain yanip naa, te hir ap nikaap hiras nar ik hir natin mesik nerp.

Yi eiyu han tokik eimerir Mitik Iuwe Jisas kaknen

^{7c}Nai yinan, yi han tokik eiyu me menmen enum mamnen mamiwep me wi yi yemerir Mitik Iuwe kaknen. Yi han ekitet im e. Mitik kamir ni, hirak kemeriyiwem hiram mamri mamine nikum. Hirak han tokik kau kemeriyiwem ere maain wepni yaaik ketike hawi hitan epei man, hiram mamri. ^{8d}Yi eire mitik kamir ni, yi han tokik eiyu me menmen enum mamnen mamiwep me wi yi eimerir Mitik Iuwe eiyintar hirak menep pike kaknen. ^{9e}Nai yinan, yi ap einahan eitipan enum emit eiyintar God kerek kertei menmen yapirwe kiri, menep hirak pike kaknen. ¹⁰Nai yinan yi han ekitet mit profet nipaa God keruiweti newepyapir natip him mirak. Hir mit nerekyor enum te hir han tokik natin mesik nerp. Haiu emises menmen hir niriakem. ^{11f}Haiu matip hir mit hir yaain nentar hir han tokik nau neit. Yi nepei yertei mitik Jop hirak nipaa han tokik kau keit kises God ke menmen enum epei man mewaankek te God hirak kerekyiwek yaaim kentar God hanhan haiu mit yapirwe te hirak han teweninai. Te haiu han tokik emu me menmen enum mamnen mamwep.

Haiu ap mamtip mit him “Tru Antap”

^{12g}Nai yinan, menmen im hiram minin te hi hetpiyem mar im, yi yiriak menmen me mit yi ap eitip “Tru Antap” au emit! Yi eitip, “O, hi hiriakem,” hiram werek o yi eitip, “Au, hi hinapen,” hiram werek. Him ham emit te yi ap eiriak God han enuk kakirwi. Mitik yaaik kitehi God menmen hirak kakimtewem.

Mitik yaaik kitehi God menmen, hirak kakimtewem kakikepik

^{13h}Neimin ne yi mit menmen enum mewaanki, yi eiyitehi God em. Neimin ne yi mit yi han yaaik, yi eiyine henye me eiwenipi God

^b 5:5 Lu 16:25; Jer 12:3, 25:34 ^c 5:7 Lu 21:19; Diu 11:14; Jer 5:24; Joe 2:23 ^d 5:8 Ro 13:11-12; Hi 10:25; 1Pi 4:7 ^e 5:9 Mt 24:33 ^f 5:11 Eks 34:6; Sam 103:8, 111:4 ^g 5:12 Mt 5:34-37 ^h 5:13 Kl 3:16

eiriuwere^m. ¹⁴ⁱNeimin ne yi mit yi yinap, yi einine mit iuwe ninin naanmipre menmen me God te hir naninen nanitehi God ke yi mit hir nanwen hiwer maminteri nankine niuk me Mitik Iuwe. ¹⁵^jHir nitehi God me yi mit, hir han kitet hirak kakikepi, te Mitik Iuwe kakikepi kakikekyi yi yayikrit manpenun yayu. Yi yiriak menmen enum te God kakisak menmen enum yi yiriakem mamno. ¹⁶Te yi mit eiwepyapiran menmen enum yi yiriakem, yi eiyyitehiyan God te hirak kakikepi te yi eiyyikrit eiyyu. Mitik kises God werek werek, hirak kitehi God menmen, hirak God kakimtwem kakikepi me menmen. ¹⁷^kIlaisa hirak nipaa hirak mitik kepir ke haiu mit, hirak kitehi God iuwe te hawi ap kaknen au. Hawi ap kan me tito wikak im metike wenke hispinak kiutip (6). ¹⁸^lEpei au, hirak pike kitehi God te hirak kesiuwe hawi kan ti ik kewet tipar menmen te hiram mewe. Te haiu mit emitehi God menmen iuwe hirak kakimtwem kakikepai kakir ek.

**Keimin kinaaiwir God kises han kirak, haiu pike
emtiwekhis pike kaknen kakises God**

¹⁹^mNai yinan, keimin ke yi mit hirak kaknaiwir him yaaim me God, mitik hak kaktiwekhis eknen, ²⁰ⁿhirak han ekitet menmen im. Keimin hirak kakithis mitik hirak kinaaiwir him yaaim me God hirak kaknen, hirak kakikaap himin kirak ap te kaki, hirak kakriak God hirak kakisaak menmen enum nipaa mitik kinaiwirek hirak kiriakem.

Mepir keremem

ⁱ 5:14 Mk 6:13 ^j 5:15 Mk 16:18 ^k 5:17 1Kin 17:1; Lu 4:25 ^l 5:18 1Kin 18:42-45
^m 5:19 Ga 6:1 ⁿ 5:20 Sam 51:13; Pro 10:12; 1Pi 4:8